



# QUÆSTIO MEDICA,

CARDINALITIIS DISPUTATIONIBUS

manè discutienda in Scholis Medicorum, die Jovis  
vigesima Octobris.

M. CLAUDIO BERGER, Doctore Medico,  
Decano, Præside.

*An arthritidi obnoxiiis γαλακτοποιία?*

I.

QUAMVIS cœlestis materiæ constitutio, & animatæ molis dispositio una eademque passim appareat, vernaculi tamen morbi in certis terrarum plagis, & animalium partibus, cum quâdam sexûs, ætatis, necnon conditionis prælectione, grassantur: & sporadicorum non pauci, dum in mares, sorte meliùs habitos, involant, scæminis & mancipiis parcunt; modò illæ, nec mensibus defraudatæ, nec virili licentiâ effrænæ vivunt. Sic Alpinis bronchocele, strumæ Hispanis admodum sunt familiares. Sic in Italia quondam mentagram sensere primates, plebe intactâ. Istiusmodi sanè indolis est articularis affectus, *μυστικὴς ἢ μυσόπικτος*, ut creberrimum virorum *εὐχευέντων*, martyrium audiat; qui licet de quovis articulorum dolore dicatur, veriùs ab illâ specie, quam ab humore quasi guttatim cadente, guttam vulgus appellitat, nuncupatur. Hæc universalis, particularis, diversa, prout hanc vel illam partem indifferenter invadit, fixa vel vaga, constans vel fugax; & pro vario causarum antecedentium genere, nunc quas adoritur partes lentè rodit, nunc intensè cruciat; interdum, ab avo, atavo, hæreditaria; interdum ex moribus acquisita; nonnunquam nodis & tophis stipata graditur; nonnunquam apertè fûrit, gravissimis symptomatis atrox; & longioribus, brevioribusve intervallis recurrens, rarissimè perseverat. Aliàs ab occultis principiis, statisque periodis; aliàs ab evidenti causâ & subito reviviscit. Demùm ab incerto vivendi ritu frequens arthritidis occasio est. Hinc ad ejus prophylaxin medico non satis sit, si subductâ humorum colluvie, nutrice[m] mali velut in cunis suffocaverit; nisi eò quoque cibò reficiat patientem, qui & ferocientes humores compescat, & languenti ventriculo negotium non facessat.

**A**RTHRITIDIS auctor est serum, salino recremento coinquatum. Hoc, cum in partes irrumpit, functiones ut plurimum interpellat. Enim vero est ubi acrimoniâ ferrox exteriores aggreditur, cum in sanguine, fervidiore videlicet, ebulliens in halitûs elevatur: hinc in cutim suppositasve membranas instar roris effusum, rheumatismum, seu mavis universalem phlogosin, citratumorem, & cum dolore lancinantem, accendit. Est ubi in juncturas excurrens eas altè fodicat, vicinaque periostia spiculis suis latè pungit. Efferus ille humor quas adigit partes rarò extumescit, mole sæpe exiguum, sed malitiâ potens. Concipit vires ab aère, cum hic, aut madore lento emollit articulos, aut acurò frigore frangit: nec minùs à pravis frugibus & uberiori victu fovetur. Porro si ad isthæc ventriculi dispositio singularis, ex adulteratâ fermenti crasi, accedat, tunc largior crapula, & indigesta succorum colluvies, sanguinem assiduâ labe respargunt. Is variè & multipliciter alteratur, quatenus multiplex & varium est vitium coctionis. Omnis tamen actio, quâ malè afficitur, salinis particulis tota debetur. Ventriculus non uno, sive proprium illud sit, sive partium incumbentium, calore conficit cibos, huic, à saliva continuò deglutitâ, & ventriculi fermento, vis solvendi inest; quæ si benè morata, bellè & citissimè concoquit, quæ solida, liquida, cruda vel cocta quotidie ingeruntur. At si quando arthritide subinde recidivâ obtunditur, tunc fluctuant alimenta, quæ mox, non convenienter attrita, in crudum & impurum liquamen secedunt. Ægrè itaque podagricum restituas, nisi hisce refoveas maceratum, quæ nullâ ferè tùm spirituum, cùm liquoris solventis, facultate egent, ut detrimenta refarciant,

III.

**A**LIMENTUM assiduè superingestum, longam in fervente & fermentato ventriculo moram trahit. Inde resolutus languet fermentativus latex, quoties in illum derivant cœnæ pretiosæ & sumptuosæ, aut alterius famis irritamenta. Nimirum quò elaboratior cibus est, eò errori paratior. Malè curioso palato quæris lenocinia, quibus perdurat esuries exuberante satietate. Hæc ab helluonum ingluvie tam molestè ascendunt, quàm jucundè descendunt, & ea sunt quæ magis arthritidem irritant: quæ idcirco non torquet infantes, quod sobriè nutriantur. Frustra fomitem illius aliunde repeteres. Hinc subiti cruciatûs, cum *crudum pavonem* indomitaque opsonia in aqualiculo portas. Hinc digestionum anomalix, cum imparia, imparibus commissa, tumultum movent. Sic augetur minera mali, & corpus cùm suâmet, tùm cruditatis mole gravatur. Quàm longè salubriùs pascitur qui obnoxius

arthritidi, à liberis vivendi proclivitate dum sibi temperat, ea in nutrimentum assumit, quæ vel ad chyli naturam attingunt proximè, vel in illius substantiam facillimè convertuntur; qualia sunt quæ simplicia, tenuia & flexilis contexturæ, solventi sine negotio cedunt. Hæc acres humores deliniunt, massæ lenitatem conciliant, salina deturbant. An ab animalium carnibus tostis, elixis, piperatis, salitis, isthæc commoda? Illæ quemadmodum tot varia, gulæ lascivientis inventa, ab arthriticorum culinâ feliciter exulabunt, quæ cum duris ac diversimodè intricatis fibris consent, resistunt ventriculo, discedunt non sociata, & in humores refusa, vel seditionem promovent, vel in articulos imbecillos concitant fluxionem. An non prudentius sapis, qui lacte simplici, crudo & sine condimento, contentus vesceris? istud sapore & consistentiâ æmulum chyli est, levi fervore digeritur, facilè permeat, & in visceribus quibuscunque mutationes legitimas subit.

## I V.

**L** A C hominum, quadrupedum & cetaceorum alimentum primum, liquor est subdulcis, in qualitatibus temperatus, ab aliorum communione segregatus in mammis, fermentò peculiari, & mollioribus glandulis. Utrum à chylo aut sanguine immediatè mutato sit, parùm refert. Non in quovis sexu, non in diverso tùm vitæ, cùm sortis statu, ex æquo reperitur. Ad monstrum accedat si lac in feminâ virgine reperiatur: Coalescit ex substantiâ triplici, levi operâ alterandâ, quoties à congenitis recedit dissociata. Harum alia sulphurea est, pinguis & inflammanda; alia *salso-nitrosa*, macra, & aciditatis volatilis particeps; alia denique sicca, terrestris, lixivialis fixa. Lac autem, tam in specie, quàm in individuo, non est unius naturæ; pascendi modo sordescit; acescit libidine, & imaginatione commotum vappescit. Imprimis nobile est, quod inter crassum & tenue, genuino & albicante colore splendescit, odore suave & blandum, sed nobilissimum est, si recenter mulctum, pleno ab ubere, saporis sit perdulcis & saccharati. Hinc procul falsedinis, acridinis, viroris, amaroris, acerbatis, insipiditatis suspensiones. Lactis omne pretium ab aspectu loci, ab ubertate soli, à delectu pastûs & à temporum ratione. Ejus quinque præcipuæ species ad hominum usus designantur; humanum scilicet, quod nascenti magis ænalogum, caprillum consistentiæ mediocris, sed siccioris; ovillum plus caseo, quàm serô dives, quo ad exuberantiam asinum superabundat. Verùm, ad arthriticorum levamen & nutrimentum, palmam aliis bubulum subripit, si cum legitimis dotibus, statis dierum horis, ventre ab hesternis repurgatò, per se solum, vel cum pane saltem optimæ notæ, oggeratur. Hoc pingue consistens plurimùm nutrit, quia maximè butyrosus; & hâc parte sui inviscat

4  
aculeos acerrimi feri, pungentes retundit; serosâ marcescentes & resiccatos articulos lenit, quos caseosâ firmat. Num igitur lac sic comparatum stomacho quantumvis fracto, vim infert? quin potius mollioris hujus alimenti pars humoribus advenit, quæ sodalium diffidia sedet, & labores, si quos artus habeant, unâ egregiè demulceat.

V.

**H**OC ex fundamento, cum plurima eveniant homini, quæ ar-  
periculosius curat, quàm missa facit; eò quòd tam medican-  
tium operam, quàm medicaminum vires ludant: quisquis ad arthri-  
ridem, dum viget adhuc, compescendam incumbit, doloris sedem  
vel parègoricis, quæ acidum mordens implicare sunt nata, liniat; vel  
admotis, saltem cautè, quæ reserant poros, per halitus serum educat,  
quod intus retentum angebat. Illa tamen cum delectu præscribet,  
qui uti articulorum, ita & humorum peccantium mores novit. Fer-  
menti acquirunt acridinem reliquæ crassamenti, quâ suo tempore,  
nocent; cum, recurrente catharro, acerbis efferantur. Idem de  
narcoticis tibi iudicium esto, quæ non minùs partis afflictæ, quàm  
tormenti robur relaxant. Primus curantis scopus circa peculiare  
viscerum nutriciorum intemperies versetur, in quibus tacitè cuditur  
juncturarum tortor. At dum ad arthritidem præcavendam accin-  
gitur, ratione & experienciâ edoctus, sicut ad venæ sectionem celer,  
sic ad serosam biliosamve illuviem quovis modo deturbandam len-  
tus festinet. Sua sint *Κεκοινηται* empiricis, & quibus *της βαρυνου*,  
inexplebilis cupiditas adest. Hujus affectûs eradicationem spondeat,  
cui facilè & proum est idiotarum animos inescare, insomnis, si velit,  
ad fornaces palleat, metalla reverberet, liquet; vel vegetabilia di-  
gerat & maturet, quæ cassâ & irrita arthritico offerat, dum interea  
dogmaticus è vaccarum uberibus ducit, quod eidem utiliùs consulat.  
Hinc fallitur quisquis, spretâ diætâ, omne artis præsidium in operosis  
ponit. Tutissima sunt in arthritide, quæ nutriendo medentur, hæc  
velut nativam temperiem visceribus reddunt, sic vitiatam sanguinis  
crasin emendant, atque currentis, ad ægras partes feri impetûs  
sistunt. Lac per fotum, per balneum, si extrinsecus admoveatur,  
internos dolores sopit: quid ab illo non sperandum, si prout expe-  
dit haustum & debitè subactum, præcordiis opem ferat, & squal-  
lentes ac languidos artus, sensim & sine sensu, pristinæ firmitati  
restituatur.

*Ergo, arthritidi obnoxiiis γαλακτοποία.*

Proponebat Parisiis PETRUS JACQUEMIER, à sancto Felice Diocesis  
Tolosanæ, Baccalaureus Medicus. A. R. S. H. 1695.